



*Continuation de la parabole des dix Vierges ; et comme l'Espoux estant entré dans la maison , refuse la porte aux cinq Vierges folles.*

'EST vne doctrine assez commune , que chacun sera iugé selon ses œures propres , & non pas selon les œures d'autrui , & qu'un chacun portera son fardeau deuant Dieu. Adonc il conuient que tous se mettent en peine d'en faire bonne prouision , afin que quand ils seront inuitez par nostre Seigneur aux nopces eternelles , ils y entrent avec luy , & qu'ils ne soient priuez de sa douce presence, ainsi qu'il arriua aux cinq Vierges folles. Car ne s'estans garnies d'huile en temps & lieu , comme elles allerent en acheter , l'Espoux vint , & entra en la maison du festin & banquet nuptial , & avec luy les cinq Vierges sages y entrerent , & la porte fut fermée : Puis apres les cinq Vierges folles heurterent à la porte , ayans acheté de l'huile ; mais la porte leur fut refusée par l'Espoux. Et par cette parabole nostre Seigneur exhorte les hommes à veiller , & à se tenir tousiours sur leurs gardes , & penser au iour du dernier iugement. O combien il importe de se pouruoir en temps & lieu de bonnes & saintes œures , & se faire aymer de Dieu avec ses Saints esleus en bien faisant , afin que nous puissions estre reconnus & approuuez de luy au temps du iugement , & entrer avec luy au Royaume celeste , pour iouir en toute eternité de la ioye & beatitude de ses Saints esleus & predestinez.